



«Mir hän d AHV! Und Du? Au?»

Fascht ally Bebbi uff däre Ärde
wänn Alles, nur nid **älter** wärde...
Drbyy isch doch s **Alter** fir ally Lyt
die aller-, allerscheenschty Zyt!

Will mit **65** wirsch pensioniert,
mit **Ränte**-Gälder fynanziert,
kasch am morgue uss dr Falle,
grad soo, wie s dir perseenlig duet gfalle...
Kasch im Drämmli wider sitze,
muesch nimmy im Schtolle als Bolle schwitze,
Khasch pletzlich billyger in Zolli,
muesch nimmy schpitz syy, wien e Rolli...
und kasch in dr Baiz – in Ändi-Fingge –
probleemloos s billygschte Zwaierli dringge!
Und das Alles – das isch s Greschte –
ab sofort nur uff fremdy Keschte!

Will mir Strizzi hän d AHV!
Jä und Du? Hesch Du se au?

Klar wisse mir **Strizzi** bym gschpritzte Wysse,
dass mr Di e bitzli bschysse,
will mr nääbeby verschtoohle
no e Zueschtupf by dr IV hoole.
Und **unsere Waage** fynanziert ys die Pfluute
vom KESB als «Therapie-Schiff» uff dr Route.
Sett all das Gäld denn noonyg länge,
gsehsch uns bym Seibi ummehänge!
Dert mache mr denne «Schtroose-Muusyg»!
(Lägg mr an dr **AHV**, deent das denn gruusyg!)
So lauft das by uns dangg AHV!
Mir hän se drum! Hesch Du se au?

Es glyche Schiggsaal, wie mir **Strizzi**,
kennt au dr Carlo Conti e bizzy:
Bym Wäggang griegt är zwahr e Belohnyg!
Aber **AHV** bykunnt är noonyg!
Dr Baschi Dürr kennt das Probleem
noonyg gar esoo extreem!
Will är jo weiss und regyschtriert:
«E Wösch-Wyyb wird **NIE pensioniert!**»
Dr Morin Guy hingege weiss:
«**65?** Das isch e Scheiss!
Will my Verschtand – dasch Das wo schluucht –
scho syt Aafang aa e **Rollaator** brucht!»
Esoo griegt Mängge NIE AHV!
Mir hän se! ÄTSCH! Hesch Du se au?
Unsry **AHV** – das isch z bedängge,
duet uns nid d **Ussglyychs-Kasse** schängge!
Die zaahlt uns nämmlig s **Comitee**
uss sym groosse Portmenee.
Und will mir no rischtyg sin – zmindest gaischtyg,
bykemme mr no e **Zuesatzlaischtyg:**
Mir derfe drum bym Cortege-Renne
3 Zuesatz-Pause «unser aige» nenne!
Dert schtehn denn WC – waisch, wien ych mi <froi>!
(hoffendlig längts no! TOI, TOI, TOI!)
So griegt au unsry Proschтата AHV!
Proscht! Mir hän se! Hesch Du se au?

Esoo wänn mir **Strizzi** Dir bewyyse:
Mr kheere no lang nid zem alte Yyse!
Mir mache wytter, do in **Bäle!**
Dangg **AHV**, wo Du duesch zaahle!
Als Geegelaichtyg fir **Dy Finanziere**,
dien mir **Helvezia Strizzi** uns röwangschiere!
By uns khasch fir **jeede zaahlte Rappe**
noonem **Cortege** by uns **Ain schnappe!**
Mir saage «Dangge!» und «Tschüss und tschau!»
(fremd-finanziert dangg AHV...)
Mir nämme sy gärn! Zahlsch Du se au?)